

POSTANI MUSLIMAN

Zašto primiti islam

POSTANI MUSLIMAN

Autor knjige: Amar Husika

Redaktura: Autor

Lektura: Autor

Dizajn korica: Autor

DTP: Autor

Izdavač: Autor

Štampa:

1. izdanje (maj, 2023.)

Tiraž: 100 kopija

PDF verzija:

https://archive.org/details/postani_musliman

Kontakt:

amarhusika.books@gmail.com

ZAŠTO PRIHVATITI ISLAM

Zašto prihvatiti islam? Postoji li išta ljepše od islama? Razmisli o tome.

KLJUČ RAZUMA

Pogledajmo za primjer dizajn nekog uređaja, npr. mobilnog telefona. Dizajniran je sa određenim karakteristikama, kao što su dugmad, ekran, mikrofon, zvučnik itd i pri tome svaki ovaj element ima svoju zasebnu svrhu. Ekran omogućava gledanje sadržaja, zvučnik omogućava slušanje zvuka itd.

Ove dizajnirane karakteristike upućuju na dizajnera, na postojanje nekog ko je morao to osmisлити. Pa ako nešto tako malo poput mobilnog telefona mora da ima dizajnera, šta je onda sa kompleksnim univerzumom i svime što se u njemu nalazi? Mi kao muslimani vjerujemo da je Bog Stvoritelj i Dizajner svega što postoji.

Još jedan argument koji ide u prilog ovome je ono što se spominje u Kur'anu o postojanju stvorenja:

„Da li su oni bez Stvoritelja stvoreni ili su oni sami sebe stvorili?! Da li su oni nebesa i Zemlju stvorili?! Ne, nego, oni nisu uvjereni!“¹

¹ Kur'an, 52:35-36

Iz ovih ajeta možemo izvući **4 opcije nastanka svemira:**

- da li je svemir nastao iz ničega?
- da li je svemir sam sebe stvorio?
- da li je svemir stvoren od nečega što je također stvoreno?
- da li je svemir stvoren od strane Uzvišenog Stvoritelja Koji nije stvoren, nego je oduvijek postojao? To je naravno jedina moguća opcija.

Uzvišeni Allah nam u Kur'anu navodi razlog zašto Onaj Koji je sve oko nas stvorio **mora biti Jedan Jedin Stvoritelj.**

„Allah nije uzeo Sebi sina i uz Njega nema drugog boga! Inače,svaki bi bog, s onim što je stvorio - radio što bi htio, i jedan drugog bi nadvlađivao. Uzvišen je Allah od onoga čime Ga opisuju;“²

Nakon toga, **zašto nam je objava potrebna?** Kada pogledamo komadić tehnologije, sa njim obavezno dolazi uputstvo za korištenje. Mi kao ljudska bića jedini sebi postavljamo i moramo da postavimo pitanje: „Zašto“? Ne možemo kao životinje prolaziti kroz život navigirajući svojim instinsktima.

² Kur'an, 23:91

Da bi objava ili životno uputstvo **čovjeku bilo zaista poslato od Boga**, mora da zadovoljava određeni kriterij, npr:

- Mora biti u skladu s racionalnim i intuitivnim zaključkom o Bogu.

Na primjer, ako knjiga kaže da je Bog miš sa 40 nogu, možete sa sigurnošću pretpostaviti da ova knjiga nije od Boga, jer Bog mora biti izvan univerzuma i nezavisan. Miš, bez obzira na formu, je zavisno biće. Ima ograničene fizičke kvalitete kao što je veličina, oblik i boja. Sve stvari sa ograničenim fizičkim kvalitetima su zavisne jer postoje vanjski faktori koji su doveli do njihovih ograničenja. Bog nije "fizički" i jeste nezavisan. Dakle, ništa sa ograničenim fizičkim kvalitetima ne može biti Bog.

- Mora biti interno i eksterno konzistentna

Drugim riječima, ako na stranici 20 piše Bog je jedan, a onda na stranici 340 kaže da je Bog tri, to bi bilo unutrašnja nedosljednost. Osim toga, ako knjiga kaže da je svemir star samo 6.000 godina, onda bi to bila vanjska nedosljednost, jer stvarnost potvrđuje da je svemir stariji od toga. Ovakve i slične nedosljednosti su prisutne npr. u Bibliji.

- Mora imati putokaze do nedokučivog. Objava mora sadržavati nešto što ukazuje da je Božanska i da se ne može adekvatno objasniti naturalistički. Jednostavno rečeno, mora imati dokaze koji pokazuju da je od Boga.

Nakon izlaganja osnovnih karakteristika koje bi objava trebala imati možemo zaključiti da **je Kur'an jedina sveta knjiga sačuvana u izvornom obliku i jedina sveta knjiga sačuvana od nedosljednosti, manjkavosti, kontradikcija i grešaka.**

Primjera radi Biblija koju danas imamo prepuna je raznih izdanja, na stotine verzija koji su nastali kao prijevod od prijevoda, grešaka, kontradikcija itd. Bibliju nije napisao Isus niti su ju napisali njegovi apostoli (učenici). Evanđelje po Marku, po Ivanu... Kada su se rodili oni?

Govor kršćanskog učenjaka:

*„Bibliju su napisali i sastavili mnogi ljudi, za koje mnogi naučnici kažu da su uglavnom nepoznati, iz različitih kultura i porijekla.“*³

Prva potpuna kopija Biblije se pojavljuje u oko četiri stotine godina nakon uzdignuća Isusa, i to još napisana na grčkom jeziku, a poznato nam je da je Isus govorio aramejskim jezikom.

³ Djela čiji naslovi neće biti spomenuti

Govori kršćanskih učenjaka:

„Najraniji rukopis novozavetnog teksta je fragment veličine vizitkarte iz Jevanđelja po Jovanu, papirus biblioteke Rylands P52, koji može biti već u prvoj polovini 2. stoljeća. Prve potpune kopije pojedinačnih novozavjetnih knjiga pojavljuju se oko 200. godine, a najranija potpuna kopija Novog zavjeta, Codex Sinaiticus, datira iz 4. stoljeća.“⁴

„ogromna većina učenjaka s pravom vjeruje da je Isusov primarni jezik bio aramejski.“⁵

Isti je slučaj i sa svim ostalim religijskim tekstovima koji se pripisuju Uzvišenom Bogu.

Dobro ako je to tako, zašto Bog nije sačuvao svoje prijašnje objave? Uzvišeni Stvoritelj ljudima je kroz historiju poslao mnogo vjerovjernih i poslanika, i listova, objava. Svaki narod je imao svog poslanika ili vjerovjesnika koji mu je prenosio objavu od Boga. Abraham ili Ibrahim je dobio svitke itd.

Kada su u pitanju objave, Bog je ljudima poslao četiri velike objave a to su:

Zebur – Objavljen Davudu ili Davidu

Tevrat – objavljen Musau ili Mojsiju

Indžil – objavljen Isau ili Isusu

Kur'an – objavljen Muhammedu

neka je na svih njih Božiji blagoslov i mir

⁴ Djela čiji naslovi neće biti spomenuti

⁵ Djela čiji naslovi neće biti spomenuti

Objave koje su došle prije Kur'ana bile su namijenjene određenom narodu i zbog toga ih je Bog prepustio ljudima koji ih nisu bili u stanju sačuvati. Čak štaviše, potpuno su ih izmijenili, tako da su od Zebura su napravili Davidove Psalme, od Tevrata su napravili Toru ili Petoknjižje, od Inžila su napravili Bibliju itd.

Kada je u pitanju Kur'an, on je posljednja objava namijenjena svim ljudima koji će doći nakon poslanika Muhammeda neka je na njega Božiji blagoslov i mir, do Sudnjeg dana i zbog toga se Uzvišeni Stvoritelj obavezao na čuvanje.

Ajet koji ukazuje na očuvanost Kur'ana:

„Mi, uistinu, Opomenu objavljujemo i zaista ćemo Mi nad njim bdjeti.“⁶

Kada se sintagma „mi“ ili „nama“ koristi za nešto što je u jednini, koristi se zbog ukazivanje pohvale, tj. kada se govori o nečemu veličanstvenom, a to je Uzvišeni Allah koji nema nikakve manjkavosti.

Kur'an je zapisan i očuvan u njegovoj potpunoj izvornoj formi i niti jedno slovo nije izmijenjeno. Zapisan je i očuvan u izvornom jeziku na kojem je objavljen i sačuvan je u prsima miliona hafiza odnosno ljudi koji su ga čitavog od korice do korice zapamtili.

⁶ Kur'an, 15:9

Ajeti koji ukazuju na iskrivljenost izvornog Tevrata i Indžila

„Onima koji su judejstvo prihvatili, koji izvrću smisao riječi...”⁷

„Jedna skupina njihova uvija jezike svoje!" Knjigu čitajući, da biste vi pomislili da je to iz Knjige, a to nije iz Knjige. I govore: 'To je od Allaha!', a to nije od Allaha. I govore na Allaha laži, a to znaju.”⁸

„Od onih koji govore: "Mi smo kršćani", Mi smo zavjet prihvatili, ali su i oni dio onoga čime su bili opominjani izostavili, zato smo među njih neprijateljstvo i mržnju do Kijametskog dana ubacili; a Allah će ih sigurno obavijestiti o onome što su radili.”⁹

⁷ Kur'an, 4:46

⁸ Kur'an, 3:78

⁹ Kur'an, 5:14

Kur'an je književno ili jezičko čudo:

„A ako sumnjate u ono što smo Mi objavili robu Svome, sačinite vi jednu suru sličnu tome i pozovite i svjedoke vaše, mimo Allaha, ako istinu govorite“ ¹⁰

„Zar oni da govore: "On ga izmišlja!" Reci: "Pa sačinite vi deset Kur'anu sličnih, izmišljenih sura, i koga god hoćete, od onih u koje pored Allaha vjerujete, u pomoć pozovite, ako istinu govorite!" ¹¹

Kroz historiju niko nije pokušao da se takmiči sa Kur'anom, ili da napakosti Kur'anu a da nije bio ponižen i osramoćen.

¹⁰ Kur'an, 2:23

¹¹ Kur'an, 11:13

Na kraju je ostalo da dokažemo **poslanstvo posljednjeg Božijeg Poslanika Muhammeda**, neka je na njega Božiji blagoslov i mir. Ako smo dokazali da je Kur'an Božija Objava sačuvana od bilo kakve izmjene, onda kur'anski ajet može biti dokaz tome:

„Reci [O Muhammede]: "O ljudi, ja sam zaista svima vama Allahov poslanik," ¹²

Drugi način da se ovo dokaže jeste da kažemo da je Poslanik Muhammed neka je na njega Božiji blagoslov i mir, rekao za sebe da je Poslanik, i gledajući u autentične historijske priče o njegovom životu, ta tvrdnja se može ocijeniti na sljedeći način: Mogući zaključci su da je bio lažov, da je bio u zabludi ili da je govorio istinu.

¹² Kur'an, 7:158

- Da li je bio lažov? Ne, jer je bio poznat kao El-Emin (Istinoljubiv i pouzdan), čak i po njegovim neprijateljima. Također, lažljivci često lažu radi ovosvjetske dobiti, a Poslanik, sallallahu alejhi vesellem, odbacio ovosvjetske težnje za budući svijet. Kada su mu nudili vlast, imetak i žene, samo da se odrekne pozivanja u Allahovu vjeru, sve je to odbio dajući im do znanja da ga ništa na ovome svijetu ne može odvratiti od pozivanja ljudi u istinu.

- Da li je bio u zabludi? Zabludjena osoba je ona koja govori neistinu dok u isto vrijeme vjeruje da je to istina. Međutim, Poslanik neka je na njega Božiji blagoslov i mir, nije bio u zabludi jer je za života proricao mnoga proročanstva koja su se zaista ostvarila. Na primjer, predvidio je da će se beduini Arapi natjecati u izgradnji visokog zgrada. Kako je to moguće ako mu to nije objavljeno od Sveznajućeg. Štaviše, njegova učenja nisu učenja čovjeka u zabludi.

- Zaključak: Govorio je Istinu!

Ovdje je bitno da naglasimo **kako islam gleda na Isusa.**

Naime, islam nam daje potpunu i ispravnu sliku o Isusu odnosno Isau neka je na njega Božiji blagoslov i mir. Svi Božiji poslanici su pozivali u islam, a riječ islam znači predanost Bogu. Njihov vjerezakonik se razlikovao shodno vremenu ali osnovne postavke doktrine su bile iste.

Ljudima koji su živjeli npr. za vrijeme Musaa ili Mojsija je bila obaveza da njega slijede u vjeri koja mu je objavljena, odnosno da postanu muslimani i da slijede Tevrat, objavu sa kojom je Musa došao.

Nakon odlaska Musaa, ljudi su se odmetnuli vjere i iskrivili objavu, pa je nakon određenog vremena Uzvišeni Stvoritelj slao druge poslanike, a pretposljednji od njih je Isa odnosno Isus.

Svim ljudima koji su živjeli u to vrijeme bila je obaveza naravno da vjeruju u prijašnje poslanike i objave, ali isto tako i da vjeruju da je prijašnja objava Tevrat derogirana tj. stavljena van upotrebe dolaskom Isaa, neka je na njega Božiji blagoslov i mir, koji je opet pozivao u islam i sebe smatrao muslimanom. Objava koja je bila važeća za to vrijeme i sve do posljednjeg Božijeg poslanika Muhammeda, neka je na njega Božiji blagoslov i mir, je bila Indžil.

Religija sljedbenika Mojsija je bila islam, a oni su nazvani Jevrejima jer to ime znači „najstariji sinovi Jakubovi“.

Religija sljedbenika Isusa je bila islam, a oni su nazvani Nesaaraa ili Kršćanima jer to ime znači „pomagači“ (oni koji su pomogli Isusa).

Od dolaska Muhammeda, neka je na njega Božiji blagoslov i mir, pa sve do danas i sve do Sudnjeg dana, svima prije nas, nama samima i onima koji dolaze poslije nas je obaveza da vjerujemo u sve Božije poslanike, ali naš poslanik je Muhammed, neka je na njega Božiji blagoslov i mir , mi pripadamo njegovom narodu, Objavu sa kojom je on došao slijedimo, a potvrđujemo prethodne objave s tim da vjerujemo da su derogirane. Kada je u pitanju Isa, neka je njega Božiji blagoslov i mir, on je bio običan čovjek, Allahov rob, i Allahov poslanik.

Poslušajmo šta Uzvišeni Allah govori u sljedećim ajetima:

„Nevjernici su oni koji govore: "Bog je – Mesih, sin merjemina!" Reci: "Ko može spriječiti Allaha da, ako hoće, uništi Mesiha, sina merjemina, i majku njegovu, i sve one koji su na Zemlji?" Allahova je vlast na nebesima i na Zemlji i na onome što je između njih; On stvara što hoće, i Allah sve može.“¹³

„Poslije njih poslali smo Isaa, sina merjemina, koji je priznavao Tevrat prije njega objavljen, a njemu smo dali Indžil, u kome je bilo uputstvo i svjetlo, i da potvrdi Tevrat, prije njega objavljen, u kome je također bilo uputstvo i pouka onima koji su se Allaha bojali“¹⁴

„Nevjernici su oni koji govore: "Bog je – Mesih, sin merjemina!" A Mesih je govorio: "O sinovi Israilovi, klanjajte se Allahu, i mome i vašem Gospodaru! Ko drugog Allahu smatra ravnim, Allah će mu ulazak u Džennet zabraniti i boravište njegovo će Džehennem biti; a nevjernicima neće niko pomoći.“¹⁵

¹³ Kur'an, 5:17

¹⁴ Kur'an, 5:46

¹⁵ Kur'an, 5:72

Isus, neka je njega Božiji blagoslov i mir, nije razapet kao što kršćani vjeruju, nego je razapet mladić koji je pristao da dobije lik Isusov, u zamjenu za raj na istom stepenu kod Isusa, a Isusa, neka je njega Božiji blagoslov i mir, je Uzvišeni Stvoritelj Sebi uzdigao¹⁶ i vratit će ga kao jedan od Velikih predznaka Sudnjeg dana.

*„i zbog riječi njihovih: "Mi smo ubili Mesiha, Isaa, sina merjemina, Allahova poslanika!" A nisu ga ni ubili ni raspeli, već im se pričinilo. Oni koji su se o njemu u mišljenju razilazili, oni su sami o tome u sumnji bili; o tome nisu ništa pouzdano znali, samo su nagađali; a sigurno je da ga nisu ubili, već ga je Allah uzdigao Sebi. A Allah je silan i mudar.“*¹⁷

Kada se on vrati, i on će slijediti vjerozakonik tj. šerijat sa kojim je došao posljednji Božiji Poslanik Muhammed sallallahu alejhi vesellem i slijedit će Kur'an kao posljednju Božiju Objavu.

¹⁶ Tefsir Ibn Kesir, En-Nisa 158. ajet, sahih predaja

¹⁷ Kur'an, 4:157-158

A o jedinoj ispravnoj vjeri govore sljedeći ajeti:

*„Vjera je kod Allaha, doista, islam!“*¹⁸

*„A onaj koji želi neku drugu vjeru osim islama, neće mu biti primljena, i on će na onome svijetu nastradati.“*¹⁹

Poljednji Božiji Poslanik Muhammed neka je na njega Božiji blagoslov i mir je rekao: *„Tako mi Onoga u čijoj je ruci Muhammedova duša, neće niko iz ovog ummeta (tj. svih ljudi na Zemlji) čuti za mene, bio židov ili kršćanin, a zatim umre i ne povjeruje u ono sa čime sam poslan, a da neće biti stanovnik Vatre“*²⁰

¹⁸ Kur'an, 3:19

¹⁹ Kur'an, 3:85

²⁰ Sahihul Muslim, 153. sahih hadis

KLJUČ ISKUSTVA

„On je Taj Koji vam omogućava da kopnom i morem putujete, pa kad ste u lađama, i kad one, uz blag povjetarac zaplove s putnicima, te se oni obraduju tome, naiđe silan vjetar i valovi navale na njih sa svih strana i oni se uvjere da će nastradati, iskreno se mole Allahu: "Ako nas iz ovoga izbaviš, sigurno ćemo u zahvalne spadati. A kad ih On izbavi, odmah potpuno neosnovano na Zemlji nasilje čine. O ljudi, vaše nasilje koje činite radi užitka u životu dunjalučkom samo vama šteti; Nama ćete se poslije vratiti i Mi ćemo vas o onom što ste radili obavijestiti.“

21

Kada bismo stavili ruku u ključalu vodu, naš mozak bi automatski instinktivno odgovorio da se udaljimo! Ne čekamo i ne pitatamo se da li treba tako postupiti. Nesreće, smrt člana porodice, gubitak zdravlja, finansijski problemi ili neposredna prijetnja smrću (poput one koju Allah spominje) su sva negativna **iskustva koja mogu aktivirati našu urođenu spoznaju o Bogu**. Zamislite samo da se nalazite u avionu koji se zapalio i padate prema zemlji. Nema sumnje da bi vaša prva pomisao bila „Bože, spasi me ovoga.“

Slično, pozitivno iskustvo također može učiniti isto. Na primjer, neko ko čuje ezan, pozitivna iskustva sa muslimanima, vidi svoje dijete kako se rađa itd. Koliko ljudi li je samo prihvatio islam samo zbog bratstva koje su osjećali?

²¹ Kur'an, 10:22-23

Abdullah ibn Selamovo pozitivno iskustvo samo gledanja u lice Poslanika sallallahu alejhi ve sellem bilo mu je dovoljno! Rekao je: "Kada je Allahov Poslanik, sallallahu alejhi ve sellem, došao u Medinu, ljudi su pohrlili prema njemu i govorili su: "Došao je Allahov Poslanik!" Abdullah ibn Selam je rekao: „Došao sam zajedno sa ljudima i kada sam pogledao u lice Poslanika, shvatio sam da njegovo lice nije lice lažova.”²²

Uslišavanje molitve je također **dovoljno da probudi** fitru tj. **priodni osjećaj potrebe za Bogom.**

Allah kaže:

*„I kada ste od Gospodara svoga spas zatražili, On vam se odazvao.“*²³

*„Gospodar vaš je rekao: "Pozovite me i zamolite, Ja ću vam se odazvati!"*²⁴

Također, za vrijeme Poslanika sallallahu alejhi ve sellem, beduin je zamolio Poslanika sallallahu alejhi ve sellem da moli za kišu, jer su usjevi propadali i ljudi umirali od gladi. Poslanik sallallahu alejhi ve sellem je molio Allaha za kišu, i skoro odmah su počeli da se okupljaju oblaci i počela je jaka kiša.²⁵

²² Džamiut-Tirmizi, 2485. sahih hadis

²³ Kur'an, 8:9

²⁴ Kur'an, 40:60

²⁵ Sahihul Buhari, 1033. sahih hadis

KLJUČ REFLEKSIJE

U nekom trenutku tokom ove stvari koju nazivamo 'životom', postoji mnogo pojedinaca koji prolaze kroz egzistencijalnu krizu i počinju postavljati "velika pitanja" o životu, čovjeku i svemiru. Ljudi mogu doći do određenih zaključaka o svrsi svog života i o tome šta moraju učiniti da bi postigli konačan uspjeh.

Razmisli o sljedećim pitanjima:

Zašto si ovdje?

„Džine i ljude sam stvorio samo zato da Meni u ibadetu budu.“²⁶

Ko si ti?

Allah rob.

Gdje ideš?

„Allah je nebesa, vidite ih, bez stupova podigao, i onda se nad Aršom uzvisio, i Sunce i Mjesec potčinio; svako se kreće do roka određenog. On upravlja svim i potanko izlaže dokaze kako biste u susret s Gospodarom svojim čvrsto bili uvjereni.“²⁷

Refleksija je slična onom osjećaju kada osoba ima pozitivno iskustvo. Ali oni koji razmišljaju o sebi, svojoj okolini, široj slici, prirodi, nebeskim tijelima, svemiru itd – to su sve **prvi koraci** ili ključevi **buđenja fitre**.

²⁶ Kur'an, 51:56

²⁷ Kur'an, 13:2

U mnogim ajetima, Allah nam govori da ima znakova na ovom svijetu za one koji razmišljaju:

„U stvaranju nebesa i Zemlje, u smjeni noći i dana, u lađi koja morem plovi s korisnim tovarom za ljude i u vodi koju Allah pušta s neba, pa tako u život vraća zemlju nakon zamrlosti njene, po kojoj je rasijao svakojaka živa bića, u usmjeravanju vjetrova i oblacima koji između neba i Zemlje lebde - ima, doista, znakova za one koji razumiju.“ ²⁸

„Život na dunjaluku samo je igra i zabava, a ahiret je, zaista, bolji za one koji se nastoje ušćuvati. Zar ne razumijete?!“ ²⁹

„I On je Taj Koji je Zemlju rasprostro i na njoj nepomične planine i rijeke stvorio i od svakog ploda po par, muško i žensko dao; On dan zastire noću. U tome, doista, ima dokaza za ljude koji razmišljaju. Na Zemlji ima predjela koji jedni s drugima graniče, i bašča s grožđem, i njiva, i palmi; sa više izdanaka i samo s jednim, i jednom te istom vodom se napajaju; ipak plod nekih činimo ukusnijim od drugih. U tome, doista, ima znakova za ljude koji razumiju.“ ³⁰

²⁸ Kur'an, 2:164

²⁹ Kur'an, 6:32

³⁰ Kur'an, 13:3-4

KLJUČ DUHOVNOSTI

Islam nas oslobađa od obožavanja svih drugih i svega drugog, i usmjerava nas na obožavanje samo Onoga koji je zaslužan za obožavanje - Svemogućeg Boga. Postoje mnoge **stvari prema kojima ljudi imaju tendenciju** „obožavanja“ ili postajanja „roba“ dotičnim stvarima.

Mnogi od nas imaju težnju da znaju, vole i pokoravaju se nečemu najviše od svega. To može biti i nama samima, kada želimo da znamo, volimo, pokoravamo se vlastitom egu i strastima najviše. Mislimo da smo uvijek u pravu, da nikada ne možemo pogriješiti, i mi uvijek želimo da se nametnemo drugima. Iz ove perspektive, mi robujemo sami sebi.

Allah opisuje one koji svoje strasti uzimaju za boga:
*„Šta misliš o onome koji je svoju strast za boga svoga uzeo, onome kome je Allah, a on svjestan bio dao da je u zabludi, i sluh njegov, i srce njegovo zapečatio, a pred oči njegove koprenu stavio? Ko će ga, ako neće Allah, na Pravi put uputiti? Zašto se ne prisjetite?“*³¹

³¹ Kur'an, 45:23

Također bismo mogli imati tendenciju da „obožavamo“ ili da „robujemo“ društvu, kulturi ili materijalizmu (tj. imetku, modi, novcu). Počinjemo da volimo ove stvari više od bilo čega drugog, želimo da znamo više o njima, a to nas navodi da im se 'pokoravamo' u odnosu na sve ostalo.

Na kraju krajeva, svi su robovi nečega ili nekoga i stoga, ako ne obožavamo Boga, sigurno obožavamo nešto drugo. Ipak, kada jednom osoba prihvati samo Allaha kao Onoga koji Jedinu zaslužuje da bude obožavan, ona više nije rob lažnih gospodara, već je samo rob Pravog i Jedinog Gospodara.

Allah daje dubok primjer:

*„Allah navodi kao primjer čovjeka koji je u vlasti ortaka i za kojeg se oni otimaju, i čovjeka koji je u vlasti samo jednog čovjeka - da li je primjer njih dvojice isti?! Sva hvala neka je Allahu, ali većina njih ne zna.“*³²

On nam u suštini govori da **ako Njega ne obožavamo, završićemo u obožavanju nečeg drugog**. Ove stvari nas porobe i postaju naši gospodari.

³² Kur'an, 39:29

Kur'anska analogija nas uči da bez Boga imamo mnogo 'gospodara' i da svi žele nešto od nas. Svi su 'posvađani jedni s drugima', a mi završavamo u stanju jada, zbunjenosti i nesreće. Međutim, Bog, koji zna sve, uključujući i nas same, a koji ima više milosti od bilo koga drugog, govori nam da je On naš Gospodar, i putem obožavanja samo Njega ćemo se istinski osloboditi okova stvari koje smo uzeli kao zamjenu za Njega. Iz egzistencijalne perspektive, obožavanje Allaha je istinska liberalizacija.

Zašto Allah zaslužuje obožavanje?

- **Allah je najsavršenije Biće:** 'Bog' je, po samoj definiciji, Onaj koji ima pravo našeg obožavanja i svi činovi ibadeta moraju biti usmjereni samo na Njega; ovo je neophodna činjenica Njegovog sopstvenog postojanja. Kur'an više puta naglašava ovu činjenicu o Allahu:

„Ja sam, uistinu, Allah, drugog boga osim Mene nema; pa Meni ibadet čini i kad god Me se sjetiš, namaz obavi!“ ³³

„Džine i ljude sam stvorio samo zato da Meni u ibadetu budu.“ ³⁴

- Allah zaslužuje da bude obožavan **zbog onoga ko je On**. Čak i **da nam nije dao ništa**, i dalje bi **zaslužio obožavanje**.

³³ Kur'an, 20:14

³⁴ Kur'an, 51:56

Posjeduje sva **savršena imena i attribute** do najvišeg mogućeg stepena. Zbog ovih imena i atributa se Allah mora obožavati. Bilo koja osoba koja je mudra, milostiva i ljubazna zaslužuje neku vrstu pohvale. Međutim, Allah koji je - Mudar, Milostivi i Ljubazni, i sve to u najvećoj mogućoj mjeri jeste dostojan najopširnijeg oblika hvale (tj. ibadeta).

- Allah je također jedini koji ima pravo na naše dove i molitve. **On zna najbolje šta je dobro za nas, a On također želi ono što je najbolje za nas.** Takvom Biću sa ovim atributima se treba moliti i od Njega tražiti pomoć. Važna osobina koja se tiče obožavanja Allaha je Njegovo pravo, čak i ako nismo primaoci nijedne vrste udobnosti. Ako bismo živjeli život pun patnje, Allaha još uvijek treba obožavati. Obožavanje Allaha **ne zavisi od neke vrste uzajamnog odnosa** tj. On daje naš život, a mi ga obožavamo zauzvrat. Ne! Nema sumnje da nas Allah obasipa mnogim blagodatima, međutim, On je obožavan zbog toga ko je On, a ne nužno zbog toga kako odlučuje preko Njegove bezgranične mudrosti da podijeli Svoju blagodat.

- Allaha obožavamo **zbog vlastite koristi:**

„O ljudi, ibadet činite Gospodaru svome, Koji je stvorio vas i one prije vas, da biste bili bogobožni.“

35

³⁵ Kur'an, 2:21

- Bitno je naglasiti da **nas Uzvišeni Allah nije stvorio iz potrebe za nama**. Mi Allahu ne trebamo. Ali sa druge strane, nama treba Uzvišeni Allah. Kada Njega obožavamo, to nas čini boljim, jača nas i pomaže nam da radimo djela koja će biti uzrok naše sreće na ovom i budućem svijetu.

- Allaha obožavamo jer je to **naša svrha života i u skladu s našom prirodom** (fitrom).

Muhammed sallalalhu alejhi ve sellem je rekao: „Svako novorođeno dijete se rađa u stanju fitre.” ³⁶

- Allah obožavamo jer je **On stvorio i održava univerzum i sve u njemu**:

„Onaj Koji sve iz ničega stvara, Koji će zatim to ponovo učiniti, i Koji vam opskrbu s neba i iz zemlje daje. Zar pored Allaha postoji ijedan drugi bog?! Reci: "Dokažite, ako istinu govorite!" ³⁷

- Allaha obožavamo jer su **blagodati i opskrbe Njegovi**:

„O ljudi, sjetite se blagodati kojom vas Allah obasipa! Postoji li, osim Allaha, ikakav drugi stvoritelj koji vas s neba i iz zemlje opskrbljuje?! Osim Njega nema drugog boga, pa kuda se onda odmećete?!“ ³⁸

³⁶ Sahihul Muslim, 2659. sahih hadis

³⁷ Kur'an, 27:64

³⁸ Kur'an, 35:3

- **Ako volimo sebe, moramo voljeti Allaha:** svi želimo zadovoljstvo, sreću i produženje našeg postojanja. To je oblik samoljublja. Ako volimo sebe, moramo voljeti Allaha jer je On taj koji nas održava i stvara, On je stvorio uzroke u svemiru za postizanje zadovoljstva i sreće. On je izvor ljubavi.

Zahvalnost je jedan od najviših oblika ibadeta: Allah nam daje nebrojeno mnogo blagodati:

„I daje vam od svega onoga što od Njega tražite, i ako biste Allahove blagodati brojali, ne biste ih nabrojali. Čovjek je, uistinu, itekako nepravedan i nezahvalan.“ ³⁹

Bez obzira koliko mi bili zahvalni Allahu, **nikada Mu ne bismo mogli zahvaliti** na njegovim blagodatima. Na primjer, ljudsko srce otkuca oko 100 000 puta dnevno, što je otprilike 35 000 000 puta godišnje. Ako bismo doživjeli 75 godina, broj otkucaja srca bi dostigao 2 625 000 000. Svaki otkucaj srca nam je dragocjen. Svako od nas bi žrtvovao brdo zlata da osigura da će naša srca ispravno funkcionisati kako bi nas održali u životu. Ipak, zaboravljamo i nijećemo Onoga koji je stvorio naša srca i omogućava im da funkcionišu. Ova ilustracija nas tjera da zaključimo da mi moramo biti zahvalni Allahu, a ta zahvalnost je oblik ibadeta. On nam je dao usluge koje ne možemo nabrojati, a kada bismo ih mogli prebrojati morali bismo zahvaliti Njemu što nam je omogućio da ih prebrojimo.

³⁹ Kur'an, 14:34

KLJUČ KARAKTERA

„Vi u Allahovom Poslaniku imate divan uzor za onoga koji nadu polaže u Allaha i Posljednji dan, i koji često Allaha spominje.“ ⁴⁰

Poslanik sallallahu alejhi ve sellem je rekao: *“Poslan sam da usavršim moral kod ljudi.”* ⁴¹

U Poslaniku, sallallahu alejhi vesellem, imamo savršen primjer kako **karakter** i način interakcija s drugima, postaje **sredstvo za buđenje fitre** u njima.

Poslanik sallallahu alejhi vesellem je bio poznat kao **"istinit"** i **"dostojan povjerenja"** prije nego što je bio poznat kao Poslanik, što nam pokazuje da je Allah izabrao nekoga sa dobrim moralnim ugledom kako bi to bilo sredstvo da ljudi prihvate poruku.

„A ko govori ljepše od onoga koji poziva Allahu, koji dobra djela čini i koji govori: "Ja sam, doista, musliman!"“ ⁴²

⁴⁰ Kur'an, 33:21

⁴¹ Edebul mufrad, 273. sahih hadis, ocjena šejh Albani

⁴² Kur'an, 41:33

Karakter također možemo povezati sa duhovnošću, jer je **zahvalnost znak dobrog karaktera**.

Aiša, radijellahu anha, prenosi da bi Allahov Poslanik, sallallahu alejhi ve sellem., klanjao noću sve dok mu stopala na nogama ne bi otekla. Ona bi ga upitala: „Allahov Poslaniče, zašto to činiš? Allah ti je oprostio i prijašnje i potonje grijehe?“ Na to joj je Allahov Poslanik, sallallahu alejhi ve sellem, odgovorio: „Zar da ne budem zahvalan rob?“ ⁴³

⁴³ Sahihul Buhari, 4837. sahih hadis

KLJUČ OBJAVE

Kur'an je **izvor Božanske blagodati, spokoja i upute**, koji je započeo istog trenutka kada je Poslanik, sallallahu alejhi ve sellem, sreo Džibrila i kada mu je naređeno:

*„Čitaj s imenom Gospodara tvoga Koji stvara, stvara čovjeka od zakvačka. Čitaj, plemenit je Gospodar tvoj, Koji poučava peru, Koji čovjeka poučava onome što ne zna.“*⁴⁴

Postoji određeni **duboki efekat** koji **Kur'an ima na vjernike**. Allah kaže u sljedećim ajetima:

*„Allah objavljuje najljepši govor, Knjigu sličnu po smislu, čije se pouke ponavljaju. Od nje se koža ježi u onih koji se Gospodara svoga boje, a zatim, kad se spomene ime Allahovo, kože se njihove i srca njihova smiruju. To je Allahova Uputa kojom On upućuje koga hoće; a onoga kome Allah da daje u zabludi, njemu nema uputitelja.“*⁴⁵

*„Pravi su vjernici samo oni čija se srca strahom ispune kad se Allah spomene, a kad im se ajeti Njegovi uče, vjerovanja im povećaju i samo se na Gospodara svoga oslanjaju,“*⁴⁶

⁴⁴ Kur'an, 96:1-5

⁴⁵ Kur'an, 39:23

⁴⁶ Kur'an, 8:2

„Reci: "Vjerovali u njega ili ne vjerovali, oni kojima je još prije objavljivanja njegova dato znanje padaju licem na tlo, čineći sedždu, kad im se on čita. I govore: "Uzvišen neka je Gospodar naš, obećanje Gospodara našeg se ispunilo!" i padaju licem na tle plaćući, i on im uvećava strahopoštovanje," ⁴⁷

Ovim osjećajima svjedoče milioni muslimana širom svijeta. Na primjer, tokom Ramazana, **džamije su ispunjene suzama onih koji slušaju Kur'an** i kojima se **bude duše**. Kur'an je dubok u smislu da ne samo da stvarne riječi i značenje imaju snažan učinak na vjernike, već je čak i samo učenje duhovno iscjeljenje i budi. Ovo se odnosi i na nemuslimane, čemu svjedoče društveni eksperimenti u kojima su nemuslimani koji su slušali učenje Kur'ana po prvi put u životu, i nakon slušanja su komentirali kako su se osjećali 'opušteno' i 'duhovno'.

⁴⁷ Kur'an, 17:107-109

PRIMANJE ISLAMA

„On ukazuje na Pravi put onome kome On hoće.“ ⁴⁸

Uputu Jedino Uzvišeni Allah može da ti dadne. Ako ga iskreno zamoliš zasigurno će ti prihvatiti molbu i uputiti te u islam, jer je On Onaj ko se odaziva molbi molitelja.

Kaže Poslanik sallallahu alejhi vesellem: *“Zaista je Allah Stidljiv i Plemenit. On se stidi da ruke Njegovog roba, koji ih je podigao prema Njemu, vrati prazne i izjalovljene.”* ⁴⁹

Možeš da učiš ovu dovu koja je prenesena od Poslanika sallallahu alejhi ve sellem:

„Allahu moj, Gospodaru Džebraila, i Mikaila i Israfila, Stvaratelju nebesa i Zemlje, Znalče skrivenog i vidljivog, Ti sudiš među robovima Svojim u pitanjima u kojima se oni razilaze. Razluči mi istinu od neistine, jer samo Ti na Pravi put upućuješ onoga koga Ti hoćeš.“

⁵⁰

Na kraju, **pozivam te da prihvatiš islam. Prihvati islam danas i spasi se.**

⁴⁸ Kur'an, 2:142

⁴⁹ Sunenu Ebi-Davud, 1488. sahih hadis, ocjena šejh Albani

⁵⁰ Sahihul Muslim, 770. sahih hadis

Kako se prihvata islam?

Da bi postao musliman moraš vjerovati u **šest temelja imana (vjerovanja)**, a to su:

- Vjerovati u Allaha
- Vjerovati u anđele
- Vjerovati u Knjige tj. Objave (Zebura, Tevrat, Indžil, Kur'an)
- Vjerovati u Allahove Poslanike (Nuh, Musa, Isa, Muhammed, ...)
- Vjerovati u Sudnji dan
- Vjerovati da sve što se događa od dobra i od zla da se događa Allahovom voljom i određenjem

Nakon toga moraš izvršavati **pet temelja islama**:

- Izgovoriti šehadet
- Obavljati namaz tj. molitvu pet puta dnevno
- Postiti mjesec ramazan
- Davati zekat ako si obavezan
- Obaviti hadž ako si u mogućnosti

Nakon što izgovoriš ove riječi, tj. šehadet **postao si musliman**:

EŠHEDU EN LA ILAHE ILLELLAH VE EŠHEDU ENNE MUHAMMEDEN ABUDHU VE RASULUHU.

SVJEDOČIM DA NEMA DRUGOG BOGA VRIJEDNOG OBOŽAVANJA OSIM ALLAHA, I SVJEDOČIM DA JE MUHAMMED NJGOV ROB I NJGOV POSLANIK.

A šta nakon toga? Nakon prihvatanja islama najvažnija stvar kod tebe je da izgradiš konekciju tj. **vezu sa Uzvišenim Stvoriteljem** na način da na namaz gledaš kao komunikaciju sa Uzvišenim Allahom, jer je u hadisu došlo da je namaz razgovor sa Uzvišenim Allahom. U namazu (na sedždi) i van namaza stalno **dovi Allahu** da te **uputi na pravi** put i da te **učvrsti na istini**.

Najčešća dova Poslanika sallallahu alejhi vesellem je bila:

„O Ti koji okrećeš srca, učvrsti moje srce na Tvojoj vjeri.“ ⁵¹

Osim toga dovi **za sve što ti padne na pamet**, pa čak i za stvari koje smatraš nebitnim jer na taj način iskazuješ zavisnost o Allahu, što Allah voli kod svojih robova. Na početku ćeš imati mnoga iskušenja, a to je normalna stvar za vjernika. I znaj da nakon što si primio islam, svi tvoji prijašnji grijesi su oprošteni i ti si sada kao tek rođena beba.

„misle li ljudi da će biti ostavljeni na miru ako kažu: "mi vjerujemo!" i da u iskušenje neće biti dovedeni?“ ⁵²

„onome koji se u Allaha pouzdaje, On mu je dovoljan.“ ⁵³

⁵¹ Džamiut-Tirmizi, 3522. hasen sahih hadis

⁵² Kur'an, 29:2

⁵³ Kur'an, 65:3